



Ainezwanzigschte  
Joorgang

Fasnacht 2018

## Die Gsalzene

D' Islamische dringe vor, so kas nit goo  
Si verändre unsri Gsellschaft noodisnoo  
Mit de erschte Fyyrtig geen sie jetzt an Staart:  
Es sin Gründönersdaag und Grishti Hammelfaart!

D' Schotte stimme ab, wänn UK nid verloo  
Spanie sait: „I'r Katalane blyybet doo!“  
In dr Schwyz gieng das harmonisch ooni Mais  
Adie liebe Ziircher, gueti Rais!

Mit Sekundeglääber kasch mängs repariere  
Araldit wurd d' Naase vo dr Sphinx fixiere  
Dr allersterggschdi Lyyrn kasch z' Basel-Stadt erlääbe  
Dangg dämm duet dr Wessels an sim Sässel glääbe!

Dr Constantin duet dr Fringer aabeschloo  
Wenn me dr Fringer kennt, denn kaa me das verstoo  
Aber vermuetlig wurd's no me Vergniege mache  
Wurd dr Constantin sich sälber aini bache!

No Billag droot – s' Receycling wird lanciert  
Dr Hüppi isch scho nach St. Gallen transferiert  
Dr Aeschbi wird im Pfläghaim Bingo moderiere  
Und dr Schawinski duet me artgrächt komposchtiere!

D' Mumie us dr Barfi-Kirche isch erkannt  
Mit em Boris Johnson und dr Queen verwandt  
Bi däre Lääderhut mit Runzle fällt uns yy  
Das kennt au s' Omi vo dr Gigi Oehri syy!

Fremdi Richter wämmer nid bi uns im Land  
Fremdi Richter wämmer nid bi uns im Land  
Fremdi Richter wämmer nid bi uns im Land  
Fremdi Richter wämmer nid bi uns im Land  
Die Widerhoolig hett nyt ztue mit Gnusch im Kopf  
Dr Cassis druggt uns ständig uff e Reset-Gnopf!

### Monschterevärs

Ummeschwaafle, wenig schaffe  
Frauefuudi nochegaffe  
D' Lambbe fille – immer gäärn!  
So laufft's im Bundeshuus in Bäärn

Sexskandal im Pharlamänt  
Demokratie isch bald am Änd  
Dert dräffe linggs-grieni Emanze  
Uff alti Lustmelch mit 'me Ranze

Und im Verpfäägigs-Automat  
Liigd's Viagra schon baraad  
Wenn die Entwiggelig wytergoot  
Hämmer bald e Ständer-Root!

Im Bundeshus tobt är jetzt au  
Dr Urkampf zwische Maa und Frau  
Zwische de baide Schützegegräabe  
Duet dr Martullo-Blocher lääbe

Bi Brobleem – rain sexuell  
Gitt's jetzt e Berotigsstell  
Als Chef bewirbt sich – s' isch e Knüller  
Mit Bild vom Schritt dr Geri Müller

Was? Wie? Wenn? Vor allem, woo?  
Ka me sich begrabsche loo?  
Wo isch mi superhaisse Checker?  
Froogt d' Oberholzer-Leutenegger

Ebbis isch tatsächligg woor:  
Aine isch dert gar kai Gfoor  
Er hett e munzig glaine Böbbel  
Mir reede do vom Roger Köppel

Harmlos: Dr greescht Bubi vo alle  
Er haisst Christian Wasserfalle  
In 10 Joor wird är fescht verschregge  
Und erschti Hoor im Schritt entdegge!

Dr Eymaa seet das akademisch:  
Die Diskussion sig so polemisch  
Är haig fascht allne nooche gestellt  
Als promovierte Wyyberheld

Oobe in dr Wandelhalle  
Wott mängs sich aini go kralle  
Nur dr Ueli Giezedanner  
Macht doo nid mit – är isch e Spanner

Me said: Dr wirgellig allergröschti  
Boliddisch Yyfluss haig dr Röschti  
Fir d'Fetz sin das nur Männerfaxe  
Will ire isch jo kaine gwachse

Dr lieb Gott said: „Petrus, ojee  
Schlimm stoots um mini CVPI  
Dr Yannick Buttet isch e Büffel  
E Frauegrabscher und e Süffel!“

D' Dienstwaffe hett är miesse abgää  
Die in dr Hoose kasch em nit nää  
Doch im Wallis sage d'Wyyber:  
„Kai Angscht, s' isch numme Glaikaliber!“

Die Situation kennt eskaliere  
Wie sotti d' Schwyz druff reagiere?  
S' gitt nur ai Wäg us däre Noot  
Die Gsalzene in Bundesroot!

Die Gsalzene findsch im Facebook

Wotsch d Fasnacht mol vo inne gsee - kumm doch zue dr BSG!

[www.schnitzelbagg.ch](http://www.schnitzelbagg.ch)